

ELECTION :

আসন্ন লোকসভা নির্বাচনে প্রথম পর্যায়ের ভোটের জন্য আজ মনোনয়ন পত্র দাখিলের শেষ দিন । উৎসবের জন্য বিহারে আগামীকাল প্রথম পর্যায়ের মনোনয়ন পত্র দাখিলের শেষ দিন । গত ২০ শে মার্চ বিজ্ঞপ্তি জারির মধ্য দিয়ে মনোনয়ন পত্র দাখিল শুরু হয় । আগামী ১৯ শে এপ্রিল প্রথম পর্যায়ে ২০ টি রাজ্য ও কেন্দ্রশাসিত অঞ্চলের লোকসভার ১০২ টি আসনের জন্য ভোট গ্রহণ করা হবে । এর সঙ্গে অরুনাচল প্রদেশ ও সিকিম বিধানসভা নির্বাচনেরও ভোট গ্রহণ করা হবে । প্রথম পর্যায়ে পশ্চিম ত্রিপুরা লোকসভা আসন ও রাজ্য বিধানভার রামনগর কেন্দ্রের উপনির্বাচনে ভোট নেওয়া হবে ।

পশ্চিম ত্রিপুরা লোকসভা আসনে এখন পর্যন্ত ৭ জন প্রার্থী তাদের মনোনয়ন পত্র পেশ করেছেন । পশ্চিম ত্রিপুরা লোকসভা আসনের প্রতিদ্বন্দ্বিতার জন্য গতকাল চারজন প্রার্থী তাদের মনোনয়ন পত্র জমা দিয়েছেন । তারা হলেন বহুজন মুক্তি পার্টির প্রার্থী ব্রজলাল দেবনাথ, রিপাবলিকান পার্টি অফ ইন্ডিয়া (আঠেওয়ালে) দলের প্রার্থী আইনজীবী অর্ণব রায়, নির্দল প্রার্থী

রমেন্দ্র রিয়াং ও বলরাম দেববর্মা। ইতিপূর্বে এই আসনে মনোনয়নপত্র জমা দিয়েছেন এস ইউ সি আই (সি)র অরুণ ভৌমিক, আমরা বাঙালীর গৌরী শংকর নন্দী ও নির্দল প্রার্থী মিলন পদ মুড়া সিং।

এদিকে, আগামীকাল পূর্ব ত্রিপুরা লোকসভা সনের নির্বাচনে বিজ্ঞপ্তি জারি করা হবে ।

Nomination submission :

লোকসভা নির্বাচনে পশ্চিম ত্রিপুরা আসনের বিজেপি প্রার্থী বিপ্লব কুমার দেব ও রামনগর বিধানসভা কেন্দ্রের উপনির্বাচনে বিজেপি প্রার্থী দীপক মজুমদার আজ মনোনয়নপত্র জমা দেবেন। এর আগে আজ সকাল ১০টায় আগরতলার রবীন্দ্র শতবার্ষিকী ভবন প্রাঙ্গণ থেকে এক মিছিলে অংশ নেবেন মুখ্যমন্ত্রী অধ্যাপক ডাঃ মানিক সাহা ও হরিয়ানার মুখ্যমন্ত্রী নায়াব সিং সাইনি। বিজেপি রাজ্য সভাপতি রাজীব ভট্টাচার্য গতকাল এখবর জানিয়েছেন। উল্লেখ্য আগামীকাল পূর্ব ত্রিপুরা উপজাতি সংরক্ষিত আসনের বিজেপি প্রার্থী মহারানী কৃতি সিং দেববর্মা মনোনয়নপত্র জমা দেবেন।

এদিকে, লোকসভা নির্বাচনে ইন্ডিয়া জোটের প্রার্থী, প্রদেশ কংগ্রেস সভাপতি আশীষ কুমার সাহা আজ মনোনয়নপত্র জমা

দেবেন। গতকাল প্রদেশ কংগ্রেস ভবনে আয়োজিত এক সাংবাদিক সম্মেলনে এ কথা জানান কংগ্রেস বিধায়ক সুদীপ রায় বর্মণ। তিনি জানান, মনোনয়নপত্র জমা দেবার আগে মিছিল ও জমায়েতে উপস্থিত থাকবেন কংগ্রেসের সর্বভারতীয় নেতা কানহাইয়া কুমার।

ECI :

তাপপ্রবাহের পরিপ্রেক্ষিতে নির্বাচন কমিশন সমস্ত রাজ্য ও কেন্দ্রশাসিত অঞ্চলের মুখ্য নির্বাচনী আধিকারিকদের পরামর্শ জারি করেছে। এতে বলা হয়েছে, ভারতের আবহাওয়া বিভাগ আসন্ন গ্রীষ্মের মরশুমে স্বাভাবিক তাপমাত্রার চেয়ে বেশি হওয়ার সম্ভাবনার পূর্বাভাস দিয়েছে। তাপপ্রবাহের সময় বিশেষ করে বেলা ১২টা থেকে তিনটে পর্যন্ত রোদে বের না হওয়ার পরামর্শ দিয়েছে কমিশন। এই সময়ে পর্যাপ্ত জল পান করার এবং বাসি খাবার এড়িয়ে চলারও পরামর্শ দেয়া হয়েছে। কমিশন নির্বাচনী কর্মকর্তাদের ভোটকেন্দ্রে পানীয় জল ও ছাউনির ব্যবস্থা সহ ন্যূনতম মৌলিক সুবিধা নিশ্চিত করতে বলেছে।

Election dept :

পশ্চিম ত্রিপুরা সংসদীয় কেন্দ্রের রিটার্নিং অফিসার তথা পশ্চিম জেলার জেলাশাসক ডঃ বিশাল কুমার আকাশবাণীর সংবাদ সেবা বিভাগকে জানিয়েছেন, পশ্চিম ত্রিপুরা আসনের জন্য, ভারতের নির্বাচন কমিশনের নিযুক্ত দু'জন সাধারণ পর্যবেক্ষক, দুইজন পুলিশ এবং একজন ব্যয় পর্যবেক্ষকসহ মোট পাঁচজন পর্যবেক্ষক আগরতলায় পৌঁছেছেন।

তিনি বলেন, যে পর্যবেক্ষকদের ভূমিকা হ'ল রাজনৈতিক দলগুলি এবং তাদের প্রার্থীরা, নির্বাচন কমিশনের নির্দেশিকাগুলো মেনে চলছেন কিনা তা খতিয়ে দেখা । তিনি জানান, আদর্শ আচরণবিধি (এমসিসি) লঙ্ঘনের বিষয়ে এখন পর্যন্ত, দুই থেকে তিনটি অভিযোগ পাওয়া গেছে এবং এক্ষেত্রে যারা দোষী সাব্যস্ত হয়েছে তাদের কারণ দর্শানোর নোটিশ দেওয়া হয়েছে।

ডঃ কুমার আরও বলেন, নির্বাচন কমিশন থেকে সুষ্ঠুভাবে নির্বাচন পরিচালনার জন্য রাজনৈতিক দলগুলির সঙ্গে নিয়মিত বৈঠক করা হচ্ছে।

RAMKRISHNA MISSION-PRESIDENT :

রামকৃষ্ণ মিশন ও মঠের অধ্যক্ষ স্বামী স্মরণানন্দজি মহারাজ গতকাল রাতে কলকাতার রামকৃষ্ণ সেবাসদন হাসপাতালে শেষ নিঃশ্বাস ত্যাগ করেন । মৃত্যুকালে তাঁর বয়স হয়েছিল ৯৫ বছর । বার্ধক্যজনিত কারণে তিনি বেশ কিছুদিন যাবত অসুস্থ ছিলেন । তাঁর প্রয়ানে বিহিন্ন মহলে শোকের ছায়া নেমে আসে ।

Madhyamik and Higher Secondary Result :

ত্রিপুরা মধ্যশিক্ষা পর্ষদ পরিচালিত এবছরের মাধ্যমিক ও উচ্চমাধ্যমিকের ফলাফল আগামী ১০ জুনের মধ্যে প্রকাশিত হবে। পর্ষদ সভাপতি ডঃ ধনঞ্জয় গণচৌধুরী গতকাল এখবর জানিয়েছেন। তিনি জানান, মাধ্যমিক পরীক্ষা ইতিমধ্যে শেষ হয়েছে। উচ্চমাধ্যমিক পরীক্ষা শেষ হবে আগামী ৩০ মার্চ। এরপর ২৪ এপ্রিল থেকে উত্তরপত্র মূল্যায়নের কাজ শুরু হবে।

BISHAW NATYO DIBOS :

আজ বিশ্ব নাট্য দিবস । এই উপলক্ষ্যে বিশ্বের অন্যান্য প্রান্তের সঙ্গে ত্রিপুরাতেও নানা অনুশ্জ্থানের মাধ্যমে দিনটি উদযাপন

করা হবে । সম্মিলিত নাট্য প্রয়াস ও শিল্পীর্থেৰ যৌথ উদ্যোগে আজ বিকেলে আগরতলায় নাট্যজনদের এক শোভাযাত্রার আয়োজন করা হয়েছে । শোভাযাত্রাটি প্যারাডাইস চৌমুহনী থেকে রবীন্দ্র ভবন প্রাঙ্গনে গিয়ে শেহস হবে । সেখানে শিল্পীর্থেৰ আয়োজনে আলোচনা ও যুব নাট্যপ্রতিভা সম্মাননা প্রদান করা হবে ।

ACCIDENT :

উত্তর জেলার ধৰ্মনগর-পানিসাগর সড়কে গতকাল সন্ধ্যায় পথ দুর্ঘটনায় বাইক চালক এক যুবক রিপন দেবনাথের মৃত্যু হয় । ২৯ বছর বয়সী এই যুবককে উদ্ধার করে জেলা হাসপাতালে নিয়ে যাওয়া হলে কর্তব্যরত চিকিৎসকরা তাকে মৃত বলে ঘোষণা করেন ।

Women's Cricket :

টিসিএ পরিচালিত মহিলাদের ঘরোয়া একদিনের সীমিত ওভারের ক্রিকেট প্রতিযোগিতা আজ থেকে শুরু হচ্ছে। মোট ১১টি দলকে

নিয়ে গ্ৰুপলিগ কাম নকআউট পদ্ধতিতে আসরে চ্যাম্পিয়নশীপের ফয়সলা হবে। মোট তিনটি মাঠে খেলাগুলি হবে।

এদিকে, টিসিএ পরিচালিত রাজ্যভিত্তিক অনূর্ধ্ব ১৩ বছরের ক্রিকেট প্রতিযোগিতার কোয়ার্টার ফাইনালের খেলা আজ থেকে শুরু হচ্ছে। এতে আজ নরসিংগড়ের পঞ্চায়েত মাঠে সদর-এ বনাম শান্তিরবাজার এবং নেপকো মাঠে সদর-বি বনাম কৈলাসহরের ম্যাচ দুটি হবে। পরে নরসিংগড়ের পঞ্চায়েত মাঠে ধর্মনগর ও বিশালগড় এবং নেপকো মাঠে উদয়পুর ও খোয়াই পরস্পরের মুখোমুখি হবে।

Weather :

আজ দুপুর পর্যন্ত আবহাওয়ার পূর্বাভাসে জানানো হয়, আকাশ অংশত মেঘলা থাকবে। বজ্র-বিদ্যুত সহ বিক্ষিপ্তভাবে হালকা থেকে মাঝারি বৃষ্টিপাত হতে পারে। রাজ্যের সব জেলায় বিক্ষিপ্তভাবে বজ্র-বিদ্যুত সহ ঘন্টায় ৩০ থেকে ৪০ কিলোমিটার বেগে ঝড়ো হওয়া বয়ে যেতে পারে বলে সতর্কবার্তা দেওয়া হয়েছে। আগরতলায় আজ সকালে সর্বনিম্ন তাপমাত্রা ছিল ২১.২ ডিগ্রী সেলসিয়াস। দিনের সর্বোচ্চ তাপমাত্রা থাকবে ৩৩ ডিগ্রির কাছাকাছি।
